



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

**Komunikadu Imprensa
Parlamentu Nasionál
08 Marsu 2021**

**Komisaun A PN halo audénsia ho JSMP no Advogadu Privadu sira
kona-ba
Esbosu Lei Orden Advogadu no Rejime Jurídiku ba Asosiasaun
Públiku Profisionál**

Iha 04 Marsu 2021, Komisaun A Parlamentu Nasionál halo audénsia pública ho JSMP no Advogadu Privadu nasionál no internasionál sira iha Timor-Leste. Objetivu husi audénsia ne'e mak atu rona no esplora hanoin no komentáriu husi advogadu privadu sira no JSMP kona-ba proposta Lei Nú 25/V kona-ba Rejime Jurídiku ba Asosiasaun Públiku Profisionál no proposta Lei Nú 26/V aprova Estatutu Orden Advogadu iha Timor-Leste.

“ Apresia iniciativa Komisaun A hodi kria diskusaun ne'e, nune'e bele akumula hanoin no idea sira hotu husi advogadu privadu nasionál no internasionál sira iha Timor-Leste no sosiedade sivil hodi hadi'a no dezenvolve lei ne'e ho di'ak antes lori ba iha diskusaun no aprovasaun iha jeneranalidade iha plenaria” dehan Diretora Ezekutiva JSMP, Ana Paula Marçal

Iha audénsia ne'e, iha komentáriu no hanoin ne'ebé barak liuliu kona-ba Estatutu Orden Advogadu nian husi advogadu sira no mós JSMP. Entre hanoin no komentáriu sira ne'e, mosu hanoin ne'ebé diferente ka kontráriu entre advogadu sira relasiona ho nesesidade atu kria Orden Advogadu ne'e.

Iha hanoin ida hateten katak seidauk to'o tempu no la nesesáriu atu kria Orden Advogadu tanba número advogadu iha Timor-Leste ki'ik tebes no bainhira Orden Advogadu harii nia la bele hamriik mesak ka independente tanba la iha kapasidade finanseira atu bele sustenta nia funsionamentu no kapasita advogadu sira.

Enkuantu hanoin ida seluk apresenta katak tempu to'o ona no nesesáriu duni atu bele kria Orden Advogadu iha Timor-Leste hodi asegura atividade advokasia iha Timor-Leste no bele iha fokus ba kapasitasaun ba advogadu sira, nune'e bele hasa'e qualidade advogadu sira-nian.

Relasiona ho kestaun kapasidade finanseira, deputadu no advogadu sira balun, inklui JSMP fó hanoin atu bele inklui kedas iha lei ne'e regalia ruma husi Governu atu bele apoiu serbisu administrasaun sekretariadu Organizaun Advogadu Timor-Leste (OATL) no mós formasaun kontinua ba advogadu sira. Apoiu orsamentu ne'e

tranzitoria de'it iha per'odu balun to'o OATL ne'e bele ona iha kapasidade financeira atu bele funciona rasik.

Kestaun independ'ensia OATL nian relasiona ho apoiu orsamentu husi Governu, distinta deputada Carmelita Caetano Moniz no m'os JSMP apresenta katak apoiu orsamentu husi Governu sei la iha impaktu ba independ'ensia OATL nian iha nia atividade advokasia. Ida ne'e tanba organizasaun no instituisaun barak tantu p'ubliku no privadu ne'eb'e hetan apoiu orsamentu husi Estadu maibe nafatin mantein independ'ensia hanesan JSMP rasik m'os. Independ'ensia ne'e depende ba organizasaun no instituisaun idaidak nia prins'ipiu hodi halo tuir nia estatutu no norma intern'al sira organizasaun nian.

Aleinde ne'e, kestaun importante seluk ne'eb'e advogadu sira foti no iha hanoin ne'eb'e diferente mak kestaun restrisaun no abertura ba advogadu internasion'al sira. Iha advogadu balun propoin atu restrinje liu tan ba advogadu internasion'al sira atu mai Timor-Leste tanba advogadu nasional sira seidak iha kapasidade ne'eb'e natoon atu kompete ho advogadu internasion'al sira. Enkuantu advogadu balun hanoin katak la prezisa atu restrinje ba advogadu internasion'al sira atu tama mai Timor-Leste tanba ho sira-nia prezensa bele tulun hodi hasa'e kapasidade advogadu timoroan sira no bele kompleta serbisu advokasia tanba advogadu timoroan sira seidak iha espesialidade ba asuntu espes'ifiku sira.

JSMP nia parte hato'o katak ezbosu lei foun Orden Advogadu nian kompara ho versaun ida uluk iha ona mundansa ne'eb'e di'ak tebes no mundansa sira ne'e barak mak korresponde ho rekomendasaun sira JSMP nian iha paraser ne'eb'e hato'o ba Minist'riu Justisa antes iha 2019¹. Ezbosu lei foun ne'e atribui ona independ'ensia no kompetensia ne'eb'e boot ba OATL, tanba iha ezbosu lei ida antes ne'e OATL iha depend'ensia boot ba Minist'riu Justisa. Nune'e, JSMP espera katak ho prezensa OATL nian bele promove efetividade no kualidade atividade advokasia iha Timor-Leste hodi kontribui ba atinje objetivu Estadu hodi asegura asesu justisa ba ema hotu.

Mezmu nune'e, JSMP haree katak iha ezbosu lei Orden Advogadu ne'e seidak inklui atividade prins'ip'al iha advokasia nian mak hanesan "Asesoria Jur'idika". Atividade ida ne'e mak tuir JSMP nian hanoin no realidade Timor-Leste nian bele sai atividade privativa advogadu sira. Atividade ida "Konsulta Jur'idika" ne'e bele ezerse husi advogadu sira no instituisaun sira seluk ne'eb'e trata m'os asuntu relevante ba kestaun jur'idika, hanesan JSMP rasik. Ida ne'e tanba iha diferenca entre "konsulta jur'idika" no "asesoria jur'idika", ne'eb'e konsulta jur'idika ne'e sei la halo akompa'amentu ba prosesu tomak kliente nian hahu husi in'isiu to'o remata, atividade ne'e fornese de'it informasaun no solusaun ba kazu ne'e. Enkuantu asesoria jur'idika ne'e akompa'na prosesu tomak hahu in'isiu to'o remata (reprezenta iha tribun'al).

¹ Detallu husi paraser bele haree iha ne'e: https://jsmp.tl/wp-content/uploads/SubmmissaunbaMJ_OrdenAdvoago_TETUM.pdf

Kestaun seluk ne'ebé JSMP hanoin atu bele konsidera iha prátika, liuliu kestaun husu pagamentu ba kliente sira tenke refleta ba realidade Timor-Leste ne'ebé maioria husi populasaun sei moris iha liña pobreza nia okos. Iha kazu balun akontese katak pagamentu ne'ebé husu aas liu fali valór ne'ebé konstitui iha kazu ne'e (valór asaun). Nune'e, JSMP sujere atu montante pagamentu ne'ebé husu tenke menus husi valór materiál ne'ebé konstitui iha kazu ne'e. Nune'e, kliente bele sente hetan benefísiu husi serbisu advokasia ne'ebé advogadu privadu sira fornese.

Entretantu iha enseramentu, Prezidente Komisaun A, distintu deputadu Sr. Joaquim dos Santos agradese ba partisipasaun no kontribuisaun Advogadu sira no JSMP iha audénsia ne'e no husu atu bele hatama paraser ba Komisaun A atu bele ajuda diskusaun ba ezbosu lei ne'e iha especialidade ne'ebé bele iha possibilidade hamosu testu substitutivu ida bainhira apresenta ba Meza Parlamentu Nasionál hodi halo diskusaun no aprovasaun.

Diskusaun ne'e hetan partisipasaun husi Advogadu sira hanesan Dr. Jose Teixeira, Dr. Manuel Tilman, Dr. Paulo dos Remédios, Dr. Pedro Aparício, Dr. Jose Pedro Comoes, Dr. Sahe da Silva, Dr. Lukeno Ribeiro Alkatiri no hosi JSMP nian mak Dra. Ana Paula Marçal, Jose Pereira, Dra. Flora Soriano Menezes, Mateus Xavier no Emanuel Rocha.

Atu hetan infomasaun kompletu bele kontaktu :

Ana Paula Marçal
Diretora Ezekutiva JSMP
Email: ana@jsmp.tl
Website: <https://jsmp.tl/>